

欽定剿平粵匪方略

欽定勦平粵匪方略卷二百九

戊午年

十一月初一日

壬申

都興阿奏言

臣嚴督兵勇於

安慶城外開挖長濠以圖扼住城賊再擬分兵
往桐協勦十月十九日接據趙克彰來稟賊衆
十數萬四路偪紮衆寡不敵急請催調等情旋
於是夜五鼓探稱賊衆攻撲桐城各營我軍馬
隊往來衝擊步隊各營紛紛出營潰走馬隊勉

強抵禦恐不能守 臣查自克復太湖石牌以來
幸得連次血戰圍攻安慶現在舒桐頓挫安慶
腹背受敵勢甚危急各營糧路難通 臣本應鎮
靜待援惟李續賓所部南勇全數潰退楚省兵
勇無多因會商多隆阿鮑超等設法撤圍趕緊
繞至太潛一帶迎頭截剿尙可望有轉機一面
飛咨總督官文立催上游兵勇星速馳援敢懇

太平府屬之銅井慈湖采石磯等處爲巢穴近
復分踞小丹陽進擾江甯鎮揚言內犯其勢甚
張臣等先經派總兵戴文英等由溧水進兵取
道小丹陽會擣慈湖銅井一帶李若珠由板橋
進兵規取江甯鎮賊巢十月十一日戴文英等
馳抵溧望東村諜知小丹陽屯賊無多當由馮
子材等輕騎疾馳掩其不備該逆大股棄營四

竄戴文英親督馬隊分路兜抄追殺十餘里斃
匪極多遂將該鎮哨樓牆卡全行焚燬由此西
去二十里爲薛鎮係銅井慈湖往來要隘據探
回竄之賊糾合各路死黨盤踞該鎮龍王山一
帶聯營樹柵遏我要衝逆首周添幅招集江北
悍賊復由金柱關渡江揚言二萬餘人卽日衝
撲官軍營盤以圖大逞戴文英等會議我師懸

軍深入利在速戰當派參將田宗揚爲中隊參將雷安邦爲左隊副將向奎等爲右隊協領穆克德恩等管帶親軍接應十三日行抵龍王山麓賊約三四千人張兩翼以待向奎等指揮兵勇搶上山梁馮子材督隊夾攻斃匪多名乘勢衝殺而護駕墩薛鎮各出逆匪兩股截我歸路戴文英令放劈山大礮環轟將賊隊衝爲數股

馬隊合力包抄斃賊甚多餘皆逃竄回巢該處設有卡隘數重守備葉雲漢等奮不顧身斬關直入登時被礮陣亡我師憤怒直前勇氣百倍向奎等從礮火叢中亂流而渡與該逆往來擊刺各受重傷猶復裹創立戰當將各卡次第焚燬共計斃賊七八百名逆衆屢經潰敗見我聲勢正盛未敢久持夤夜棄巢而逸十四日戴文

英等分途躡勦淨洗逆蹤方戴文英等進兵薛鎮也江甯鎮六郎橋等處屯賊分股往援李若珠探聞逆壘空虛當派副將劉萬德等分路襲取江甯鎮副將陳安邦等間道會擣六郎橋十五日我師銜枚疾走乘勝徑薄江甯鎮逆巢李若珠等帶隊開礮環轟壘殪守牆逆匪數十名賊勢不支劉季三等策騎過河繞出營後拔取

竹籤鹿角一擁而入賊前後受敵倉猝不及迎
拒奪路狂奔轟斃及淹溺者無算餘皆竄回銅
井陳安邦遙見火起知我兵業已得手揚旗舉
伏四面兜圍適劉萬德等追兵踵至首尾夾攻
又復殲匪數百名所有江甯鎮六郎橋兩處賊
壘十餘座同時蹋毀於是李若珠自板橋移紮
江甯鎮戴文英等自薛鎮朱門一帶進紮六郎

橋臣等當飭該鎮等乘此聲勢相度機宜攻拔
銅井老巢並派副將富升等管帶勁旅馳赴六
郎橋剋期大舉十八日戴文英等率敢死之士
五百名潛赴銅井後營奪門縱火逆壘火發槍
礮之聲連環不絕富升等摩壘先登大兵鼓譟
繼之烈燄蔽天賊衆殲斃不可數計餘匪奔逃
復經羅大春迎頭截擊斬馘尤多我師乘銳長

驅轉戰四時之久追奔五十餘里沿途席捲所向無前共克大小賊壘二十一座賊卡六道自銅井慈湖直擣采石磯逆巢醜類一律肅清從此圍攻建業西顧之憂可以稍紓實足以壯軍威惟該處距大營寫遠孤軍未便久留當飭戴文英將賊營基址悉數鏟平絕其窺伺一面整旅仍回金陵探聞漏網餘逆大半奔回金柱關

謀犯黃池先經飭令總兵鄭魁士等扼要設防
嚴杜內竄之路現在副將朱承先馳赴水陽相
機堵剿並約鄧紹良由黃池派兵會剿該鎮謀
勇兼優應令駐防瀉壩所有陣亡之守備葉雲
漢把總許榮升外委陳昭勝奮勇捐軀實堪憫
惜應請

旨飭部從優議卹奏入

上諭內閣曰江南官軍旬日之內共克賊壘二十一座
賊卡六道自銅井慈湖直濤采石磯逆巢一律肅清
攻剿尙爲妥速著該大臣等乘此聲威迅卽克復金
陵同膺懋賞守備葉雲漢把總許榮升外委陳昭勝
斬關奪卡被敵陣亡深堪憫惻均著交部從優議卹
同日德興阿奏言逆匪自踞六合後以金陵老
賊入城堅守東關外挖濠築壘並於猴子鋪一

帶設卡盤踞由陳板橋而西處處皆有賊蹤成
明督同富明阿各帶馬步兵勇越橋以進將沿
路賊卡盡毀並派令守備詹啟綸帶兵埋伏突
見猴子鋪出賊千餘名該守備帶隊迎剿成明
等分三路接應維時詹啟綸帶勇衝入賊隊賊
已不支又見我軍齊至紛紛向西敗竄富明阿
從歧路包抄截殺殆盡成明復督同富明阿進

攻六合探知猴子鋪孟家店一帶聚有逆匪數
千名派令參將英貴等由中路進剿副將馬德
昭等由左路進守備詹啟綸由右路進富明阿
等分爲兩翼博奇帶隊截其要隘成明督軍策
應諸軍鼓銳向前槍礮齊施接戰三時之久詹
啟綸首先衝入賊陣英貴馬德昭等相率繼進
賊卽回竄殪斃無算富明阿復率馬隊兜

擊該逆拌死亂竄自相踐踏屍橫遍野餘悉奔
向東關我軍跟追直薄賊壘先用噴筒火箭繼
以槍礮旋見牆內火起焚燒更棚瞭樓數處約
斃賊一千七八百名生擒七十二名查該逆堅
踞六合非掃除陳板橋以西賊黨不能緊逼城
下現在揚州防兵無多而甘泉山陳家集等處
均通六合各營後路尤所當防且天長駐兵無

幾設該逆突犯揚州實亦不能不慮臣屢囑鞠
殿華加意防範自督留邵各兵於十月二十二
日移紮五臺山其地在揚城便益門外嚴扼要
口既可就進策調各軍設西北山等處有警亦
可兼顧

德興阿又奏言臣接江甯將軍和春福建巡撫
慶端咨稱周天受及朱承先等軍均難調回而

江北馬步現止八千且多傷病勇則不滿五千
查六合迤西浦口江浦並皖省安慶廬州鳳陽
等三府所屬州縣大半皆爲賊踞儻賊分股再
竄儀揚北擾清淮實無兵勇可資堵禦可否請
旨飭調陝甘督標兵八百名河州鎮標循化保安各營
兵六百名固原提標兵六百名漢中鎮屬兵八
百名直隸大名正定兩營兵各四百名各配七

成槍礮攜帶前來至黑龍江隨征者現止二百
餘人不能成隊請

旨賜撥黑龍江省城馬隊一百名餘丁五十名布特哈
上三旗馬隊一百名餘丁五十名全帶馬匹來
揚並請

飭知陝甘總督調撥甘州孳生馬五百匹迅來揚營以
利追剿再選兵不如選將江北將領無多查有

黑龍江協領富陞阿四品官托克托布佐領額哲通額富平阿蘇楞額又陝甘督標中軍副將郭相忠署副將成瑞遊擊趙秉鑑署參將張敬王禮陳應春署守備朱子俊均以英勇著名可否仰乞

天恩卽飭各將軍總督迅飭各該員弁來揚實於剿賊有益奏入

上命軍機大臣傳諭德興阿鞠殿華成明毛三元曰總兵成明督兵進攻六合擊焚賊卡德興阿現已移營五臺山著卽督飭各軍節節進逼現在江南東自江甯鎮至采石磯百餘里一律肅清是南岸剿辦正在得手若該逆窮極思竄則北岸防剿情形愈爲喫重德興阿兵勇潰散之後馬步僅止八千自應量爲抽換惟直隸陝甘黑龍江官兵未能照數調撥致本地

空虛本日已諭慶祺樂斌酌調官兵奕山調黑龍江
餘丁馳赴該大臣軍營聽候調遣請調將領馬匹亦
諭奕山樂斌酌量派往德興阿惟當力圖振作親督
各軍自東而西將六合江浦之賊次第掃除並嚴扼
該匪紛竄之路是爲至要

上又命軍機大臣傳諭奕山曰現在江北六合江浦俱
爲賊踞必須添兵攻剿黑龍江官兵在德興阿軍營

隨征者現止二百餘人不能成隊自應添撥前往助
勦著奕山挑選餘丁一百餘名前赴揚州軍營又據
德興阿奏江北將領傷亡病撤者甚多所有黑龍江
協領富陞阿四品官托克托布佐領額哲通額富平
阿蘇楞額著奕山酌調數員派赴江北交德興阿軍
營差遣

上又命軍機大臣傳諭慶祺樂斌曰江北軍情緊要急

須攻復六合德興阿所統兵將累年征戰傷亡疲病
居多自應照數換補以期得力惟直隸爲京畿羽翼
屢經征調營伍空虛未必再能多撥著慶祺於大名
正定兩營內酌抽精銳合成四百名飭赴江北軍營
陝甘亦係邊陲要地不能悉如所請著樂斌體察情
形於所屬各標營湊撥兵一千名其所指調各該員
弁能否酌調前往江北並著該督酌量辦理至孳生

馬匹如能調撥三四百匹亦著飭赴德興阿軍營勿
致遲緩

初三日

甲戌

官文奏言臣接據都興阿咨稱十月

十九日賊匪數萬傾巢來攻桐城我軍力戰不
支紛紛潰敗桐城爲安慶犄角桐城旣潰安慶
攻圍之師前後受敵都興阿一軍前有堅城未
下後虞悍賊抄截不若暫撤以保銳氣已飛咨

都興阿由石牌宿松一路撤退並撤李續宜等
軍力扼潛太一帶以牽賊勢臣思李續賓之敗
原因急攻三河赴援廬州深入重地頓失萬餘
精銳非一二月所能復振查侍郎曾國藩前奉
諭旨督師赴閩現聞閩中已報肅清江西尙無緊要軍
事皖楚正當喫緊之時李續賓所統將弁勇丁
均其舊部收集撫馭較易爲力應請

飭下曾國藩迅速帶兵來楚以遏皖賊所有李續賓潰
散之勇現飭李續宜接管收集統帶俟曾國藩
到楚悉歸調度撫臣胡林翼前蒙

恩賞假歸葬茲葬事已畢請

旨飭令卽赴署任籌辦防剿事宜南勇方易收拾所關
甚要未可以假期未滿仍行拘泥請假緩期至
李續賓等各員雖無確實下落必已歿於行陣

數載勤勞爲賊所懼深堪憫惜奏入

上命軍機大臣傳諭官文胡林翼曰官文奏桐城兵潰
都興阿前後受敵請飭曾國藩赴楚督勦等語福建
順昌將樂汀州等處賊衆肆擾軍情緊急曾國藩本
擬由杉關入閩因軍士染患疾疫未能前進尙駐建
昌現在閩省待援孔亟而兵勇患病更未便令其跋
涉長途繞赴楚北統計楚省派出官兵及截留湖南

四川兩軍爲數不少李續賓所留兵勇亦可更換抽
撥著官文催令李續宜等星速前進力扼潛太以衛
楚疆仍會合都興阿官兵相機進剿不得以盼望援
師轉涉延誤胡林翼辦理軍務洞悉機宜現值軍務
緊急該撫業已葬親事畢著卽馳赴署任協同官文
籌辦軍務毋得過涉拘牽致有貽誤

同日曾國藩奏言臣調派官軍分道入閩張運

蘭一軍向杉關進勦順昌將樂之賊蕭啟江一
軍向廣昌進勦汀州甯化之賊吳國佐一軍擇
要駐紮以爲後路策應於九月二十四二十六
二十七等日分起拔營茲據蕭啟江稟稱汀州
賊勢浩大復有千刀會匪踞石城縣屬之迴龍
砦臣飭蕭啟江先將石城會匪勦滅再行進攻
瑞金俟江境肅清然後進規汀州甯化江閩交

界中隔大嶺自仙霞南至武平一嶺縣互殆逾
千里大關小隘處處可通現派張運蘭由北度
嶺蕭啟江由南度嶺中間泰甯南豐等處尙覺
空虛該逆仍可伺隙回竄而二年以來賊匪往
返蹂躪嶺內如建昌各屬嶺外如邵汀各屬邑
井蕭條百物蕩盡今歲疾疫流行居民鮮少閭
中田荒米貴油鹽無從購買且無現錢可換臣

駐紮建昌防中路回竄之賊計臣一軍分爲三
起擬俟張運蘭將順昌將樂賊匪搜剿淨盡歸
併汀州一路臣亦率後隊繼進三軍先分後合
可無此勦彼竄之虞惟現在建昌甯郡各屬疾
疫流行爲從來所未見張運蘭一軍前拔營時
留八百人在建昌養病啟行後又續病三百餘
人蕭啟江一軍據報病者一千三百五十六人

吳國佐一軍病者亦不下八百餘人軍行數日
長夫病困鍋帳子藥沿途拋棄輒遣勇丁回昇
病者兼拾棄物以此節節遲延實深焦灼蕭啟
江張運蘭等平日忠勇奮迅最爲出力苟可勉
強趨行斷非肯託故逗留者臣亦不忍催之又
道員劉長佑一軍駐守新城本擬調赴建昌俾
臣得以督隊入閩而該營患病尤衆幾於十人

而九不復能軍據稟新城無從覓取醫藥懇請
移紮撫州稍資調理已批令暫行赴撫俟病勢
痊愈卽行回駐建昌奏入

上命軍機大臣傳諭曾國藩曰張運蘭蕭啟江吳國佐
各軍均分起拔營前進辦理情形朕亦不爲遙制該
侍郎惟當督飭將士相機勦辦現在福建大股賊匪
併注汀州俟順昌將樂賊匪勦除淨盡卽著曾國藩

督率後隊會合張運蘭等所帶各軍進勦汀州甯化
各匪毋稍延緩至建昌等屬疾疫流行各營兵勇現
多染病著該侍郎妥爲拊循俾得迅速調治無誤軍
行

同日胡興仁奏言祁門敗匪糾合青陽悍賊分
竄石埭縣境經官兵擊退石境肅清九月初六
日退竄陵陽之賊回竄崇覺寺經江長貴督率

副將吳偉奇等擊退初九日分路進剿該逆大
股竄突江長貴等督軍擊退十八日青陽復添
股匪絡繹而來江長貴會合各營分路設伏復
挑勇抄出陵陽鎮後路併力合擊詎意南陵繁
昌各路敗匪麕聚青陽二十三日大股進竄平
坑嶺經鄧紹良所派之參將石玉龍等擊走遂
併股由泥田東衝等嶺進竄又經兵團會擊賊

卽進犯苦竹橋經遊擊陳大富戰敗於望月亭
乘勝追殺至卓村賊伏四出江長貴由閒道力
解重圍而崇覺寺警報屢至江長貴復帶隊折
回該逆進犯長木九鳳等嶺及卓村地方均經
我軍擊退其旁竄蜈蚣嶺者又經涇防將領擊
回次日江長貴敗賊於九鳳嶺復督飭陳大富
等敗賊於苦竹橋該逆遂分踞曹村陳村等處

大股進犯長木嶺我軍按旅鎮定待其偏近嶺
腳卽揮軍抄擊賊旋潰退中道設伏之馬光宗
等首尾夾擊大獲全勝陳大富亦派隊赴陳村
夏村燒其巢穴軍威大振張芾復飭副將余永
椿由祁夥前往會紮夏村三十日江長貴親督
進剿忽報賊竄夏村遂躍馬馳回揮令衝入賊
陣袁國祥亦飛騎來援余永椿抽撥之兵勇同

時踵至三路夾擊賊遂大敗是日吳偉奇在崇覺寺亦出隊擊賊獲勝時卓村敗匪尙踞泥田嶺夏村敗匪尙踞六都袁國祥等會合青石太平團練分路攻襲兩路之賊紛紛驚潰退踞陵陽鎮十月初三日各隊前進誘賊馬光宗等從右翼進黃朝陞等從左翼進江長貴等分起繼至兩路包抄已在陵鎮之後陳大富等從東衝

嶺來會劉朝林等從魚龍洞來會太平縣知縣
楊仁等會督練勇分投掩殺賊勢不支意圖旁
竄袁國祥等揮軍直入江長貴斬關進徧當將
陵陽鎮賊營毀平斃賊無數餘匪竄奔青陽下
鄉及南陵繁昌而逸追逐三十餘里其太平縣
卓村等處匪徒竄至蜈蚣嶺外之西坑嶺等處
經會得勝帶勇截殺賊衆奔敗江長貴以崇防

各隊往擊陵陽鎮賊營石玉龍派經防各隊會
同南陵防兵分路進攻該逆約五六千人前來
迎敵胡鳳鳴連斃悍賊十餘名逆勢稍卻而山
凹內伏賊二三百人突從右路抄來敗逆又復
回拒鄭國泰等冒死殺出適都司劉仁祿等從
嶺上出而夾擊各團勇復四路助戰該逆首尾
受敵敗奔卓村卡內三十日江長貴分兵由九

華嶺苦竹橋進剿各軍亦四路殺入該逆大敗而逃竄走嶺下官軍連日攻毀胡家祠戴塘橋戴家匯章村湖工山各賊卡現在涇太石埭一律廓清總兵江長貴厥功最偉其餘出力員弁懇請

恩旨優予獎勵

胡興仁又奏言臣接張芾周天受函稱婺源賊

匪有久踞之勢我軍無合圍之力以致屢攻未
下應添設勁旅二千人稽查防剿等語臣查金
陵大營咨調周天培所部三千餘人已由閩拔
隊起程前往金陵援剿其督臣王懿德先派之
副將張騰蛟管帶兵勇二千五百人計程可到
衢州臣擬將張騰蛟所帶兵勇暫留衢防歸李
定太調遣令赴白沙關駐紮俟婺源克復後再

飭前赴金陵奏入

上命軍機大臣傳諭胡興仁曰前諭周天培張騰蛟兩軍馳赴江南交和春調遣乃據胡興仁奏稱衢防緊要張騰蛟一軍擬暫留衢州歸李定太調遣現在江北浦口六合未復江南截勦各路援賊正須厚集兵力浙省全境業已肅清情形較爲鬆緩不宜以有用之兵置之防守之地所有張騰蛟一軍著該撫仍催

令趕緊前進速赴江南軍營歸和春調遣其白沙關應設防兵著胡興仁會同張芾另行籌撥

上諭內閣曰總兵江長貴督率各軍分路攻擊將陵陽鎮賊營全數毀平其太平縣卓村等處竄匪復經涇防官軍攻勦疊有斬獲將工山賊巢擊破勦辦尙爲得手著該撫嚴飭在防將士認真攻勦迅克婺源縣城江長貴著賞加提督銜遊擊袁國祥著賞給勤勇

巴圖魯名號都司銜劉祥林著以都司選用已革都司曾得勝前被叅帶勇滋鬧之案著免其提訊仍革職留營以觀後效

初八日 己卯 和春奏言溧水克復潰匪四竄勢必

糾合蕪太股逆謀犯黃池當由 臣 咨令鄧紹良

將甯國前次派赴高淳兵勇豫爲布置以固腹

地一面派總兵張玉良留守溧水鄭魁士留守

高瀋協力嚴防迨西路銅井慈湖援賊一律肅
清餘逆遁回金柱關於十月十四十五等日竄
至烏溪擄船紮卡揚言內犯鄭魁士派副將朱
承先等馳赴水陽搃堵鄧紹良派兵會勦詎該
逆號召江北悍賊勢甚猖獗孤山壩老鴉山等
處官兵均被衝潰其方村石碓奎潭一帶復爲
賊擾二十五日烏溪之賊復以大股攻撲水陽

瀉壩灣黃同時危急鄧紹良因兵單乞援臣與
張國樑等相商抽撥各營勁旅五千揀派總兵
戴文英統帶星夜取道高瀉馳赴灣黃應援會
同鄧紹良相機堵剿以厚兵力其瀉壩各防飭
鄭魁士嚴加堵禦並令張玉良酌度情形萬一
瀉壩喫緊卽派兵就近策應以免乘虛四竄至
朱承先等一軍疊奉

諭旨飭赴江北前者西路廓清卽擬派往惟此項兵勇
經鄭魁士撥赴甯防之水陽地方並分守高淳
東壩各要隘俟防務稍鬆卽飭渡江聽候德興
阿調遣

和春又奏言十月初八日遊擊鄭吉星等駕紅
單等船分攻蕪湖賊壘揮船直進拋射火箭焚
燬南北更樓二座賊卡二座殲匪甚多正在鏖

戰之際突有逆划數十繞我水師之後官兵奮力追勦擊沈十餘隻餘皆竄逸十二日探報江北潰匪千餘糾合繁昌股賊竄至峨橋築壘參將郭定猷等由陸路進勦都司馬喜由水路截擊會同石碇官兵三面夾攻該逆不敢迎拒各鳥獸散次日仍飭所部會擣峨橋逆卡斃匪約百餘人大隊一擁而進賊勢不支竄入橫山橋

而去十九日銅井慈湖潰匪由清水河搭橋撲
犯鴉山陸營蕪壘峨橋兩處又各出賊數千窺
伺魯港郭定猷等由蕪湖林士志等由雙港分
途迎剿都司馬喜等埋伏馬步橋次日郭定猷
等先令精銳屯紮煙墩山五里亭等處俟賊隊
漸近兩翼分抄接仗兩時之久我軍前後夾擊
殲匪無數峨橋之賊知我全軍登陸乘虛徑撲

魯港水營馬喜等伏兵齊起當將逆隊擊回一面馳赴五里亭助勦外委林健高等裹創力戰殺賊甚多始各潰竄並有青陽股賊千人竄至三山江岸亦經守備何夢龍擊退堪以上慰

宸廑奏入均報

聞

同日荊州將軍都興阿奏言臣自安慶撤圍後

派令步隊在前馬隊殿後次日步隊徑至石牌
馬隊紮於三橋鎮豫備接應潛山詎馬隊未到
之先潛山各營已退臣連夜帶隊趕赴石牌陸
續撤至桃花鋪一帶旋據探報逆賊由潛山至
黃泥港小池驛希圖上竄太湖時唐訓方初到
因太湖無險可守營壘未堅已撤轉張家壩扼
守陳德園一帶臣卽率同多隆阿帶馬隊趕至

新倉渡河截擊逆賊分兩路上竄我軍由黃泥
港迎剿賊匪數萬排隊抗拒多隆阿四路衝擊
槍箭齊施逆賊潰退我軍追殺三十餘里斃賊
三千餘人生擒三百餘名正擬撤隊該逆另股
萬餘由小池驛抄我後路多隆阿卽撥隊截擊
又斃賊數百名賊始怯退臣遂商同多隆阿催
趨馬隊趕至太湖城北山坳稍息馬力十月二

十五日馳抵宿松惟時鮑超率霆營已至二郎河駐紮精選各營已紮宿松探知賊由荆橋陳家大屋一帶築壘數十座距我兵營盤僅數里許是夜臣帶馬隊擺列營旁以固軍心次日多隆阿卽帶馬步分三路出隊賊衆數萬分路來撲又另股由王家畝繞抄各營臣卽分隊趕至山口堵剿奮呼直前馬隊四路橫衝斃黃衣賊

目數名賊勢漸卻我兵乘勝追擊踏毀賊營三十餘座共斃賊三千餘名生擒五百餘名追至桃花鋪一帶天晚收隊仍回宿松扼紮惟賊數甚多二郎河及黃梅亭前驛獨河橋一帶必須厚集兵力方足以資勦辦屢經飛咨督臣官文迅調副都統舒保進紮二郎河調候補道李續宜九江鎮普承堯進紮黃梅亭前驛獨河橋一

帶聯絡聲勢以壯軍威奏入

上命軍機大臣傳諭官文都興阿曰都興阿現扼宿松

兵力較單著官文卽飭前派赴援之舒保李續宜普
承堯等馬步各隊迅速前進以勦爲防不准令其蔓
及楚疆至唐訓方一軍現駐陳德園地方北路需兵
亦甚緊急一俟舒保等與都興阿會合軍情稍定卽
遵前旨仍著該員帶兵速赴袁甲三軍營聽候調遣

初九日

庚辰

勝保翁同書奏言查廬城之賊本不

過二萬餘人自楚軍攻克舒桐後金陵首逆遂
將東犯揚儀浦六之賊陸續調來凡李秀城陳
玉城等著名兇悍逆首悉在其內計賊黨已有
十餘萬人今捻匪又竄往合夥如果併力來犯
殊有賊衆兵單之慮業經嚴飭已革總兵吉順
等力守護城嚴加防範並將馬步兵勇分路布

置現在捻匪偵知定遠有備難保不向六安州
竄擾李孟羣一軍恐不能遏其兇鋒臣等已飭
令六安州知州茅念劬嚴行防守並飛催唐訓
方一軍由六安前進兼護潁壽或可藉以無虞
勝保翁同書又奏言臣等所帶

盛京吉林黑龍江察哈爾土默特官兵計不下三
千餘名旋因分撥豫省徐州並撤還歸伍所餘

吉林黑龍江有馬之兵三百八十餘名廬營馬
隊三百餘名統計不足七百遇有緊急往來調
撥每致不成隊伍南北逆氛並警我軍腹背受
敵馬隊單薄實不敷用前於夏間蒙

恩賜撥綏遠城馬隊五百名馬四百匹今閱四月有餘
止到一百名其餘馬隊及管解馬匹尙無消息
吉林黑龍江馬隊官兵傷亡病故例得咨補合

無仰懇

天恩節下各將軍於二省正兵餘丁閒散三項中如數
挑選飭令迅赴臣營調遣

勝保翁同書又奏言臣接袁甲三函稱須後路
餘捻肅清方可南下揆其詞意恐唐訓方一軍
趕到仍爲北路牽掣該京卿亦未能遽行前來
而現在張翼二首逆共踞懷遠久無專力督辦

之人頃又分股勾合廬郡粵逆僞乘虛復竄西路不獨正陽壽州岌岌震動卽潁郡霍邱固始已經廓清之區必致前功盡棄豫疆爲北竄門戶所關匪細臣等極力圖維斷不能分兵西路因思唐訓方一軍與其繞赴淮北而袁甲三仍不能前來不如先其所急就令此軍由六安正陽一路扼要進紮攻剿懷遠逆捻就近聽候臣

等調遣於勦務實有神益奏入

上命軍機大臣傳諭勝保翁同書曰前因李續賓三河失利桐城危急當諭官文飛飭唐訓方轉回潛山力援桐城俟大局布置稍定再令赴袁甲三軍營調遣茲據勝保等奏袁甲三爲北路餘捻牽掣請飭唐訓方由六安正陽一路進紮攻勦懷遠等語唐訓方一軍昨據都興阿奏已撤轉張家塆扼守陳德園一帶

以固楚疆業經諭令官文等俟楚北軍務稍定卽飭
仍赴徐宿未便朝令暮改致令無所適從其懷遠一
帶現無專辦之人著該大臣等仍遵前旨分籌兼顧
其湖南四川兵二千五百名本係勝保所調現在湖
北防堵業經諭令官文俟該省軍情稍定卽行飭赴
勝保軍營著該大臣就近催提以資攻剿

上又命軍機大臣傳諭景綸奕山曰勝保等軍營所有

吉林官兵遣撤及病故陣亡者共二百二十二名黑龍江遣撤及病故陣亡官兵共一百二十七名所餘馬隊不能成軍現當粵捻各匪交乘之際勦辦甚屬喫緊著景綸奕山各於該省正兵餘丁閒散三項中酌量挑選飭赴安徽定遠軍營毋稍遲誤

同日胡興仁奏言總兵米興朝勦賊於赤嶺牧家亭斃匪二百餘名十月十五日峨橋之賊經

副將郭定猷等從下游力擊斃賊數十名賊仍
不退千總陳科登等策馬衝鋒連砍數賊突被
羣賊圍裏陳科登潰圍殺出各軍奮勇殺上賊
斃悍賊甚多其北岸之賊渡河經副將貴廷芳
等排隊環擊賊勢不支十七日賊衆萬餘分道
攻撲經總兵蕭知音飭令各營堅守並以楚兵
隊伍紮周家村防其內竄該逆由丁村等處直

撲兵勇營盤北岸之賊亦分股來撲另股逆匪
又繞出橫岡橋圍撲廣勇智仁勇二營火器拋
入營中蕭知音正在督戰見後路火起繞道往
援時張宏得等甫自烏溪帶隊回營卽飭各軍
分路夾擊將賊擊退救滅餘火仍令張宏得等
堅守營盤維時龍正耀等禦賊於周家村衝入
賊隊突被賊匪槍傷都司張得祿亦被矛傷適

蕭知音轉戰秦家嘴督名楊金榜等夾擊道員
仲孫懋派都司黃金祥會同抵禦賊始敗退至
蕪湖之賊於十七日從廬村橋等處三路來犯
參將吳再升禦賊於五里亭已革遊擊田應科
等禦賊於小蒜山都司張宏升禦賊於廬村橋
吳再升卽會合田應科及張宏升分途迎勦遠
以槍隊轟擊近以刀矛揮殺賊中傷亡極多正

在追殺之際賊中馬隊數十騎橫馳來援各隊
奮勇抵住賊始卻退臣查鴉山孤山方村兵力
均形單薄其溪心港施家渡尤爲空虛現經鄧
紹良飛調勇丁四百名紮營溪心港軍功黃大
勝紮營施家渡遊擊劉仁福等扼紮水陽裘公
渡總兵米興朝所帶之勇交都司劉仁祿帶赴
灣沚以備策應石玉龍分撥勝勇四百名填防

南陵一面咨請和春張苦江長貴酌撤留防各
隊迅速回援以資攻剿所有已革遊擊田應科
已革都司蕭傳科前因撫臣晏端書奏叅摘去
頂戴此次南陵之役身先士卒未便沒其愧奮
之心可否仰懇

天恩准予開復出自

鴻施

胡興仁又奏言臣思甯防喫緊大營及徽防撥兵援勦恐緩不濟急現有由福建折回之兵勇二千五百名因張騰蛟患病由遊擊馮日坤等管帶前赴金陵臣當飭令馮日坤先赴甯國聽候鄧紹良差遣又查總兵周天培已行抵衢州刻下甯防兵力單弱臣擬俟其到杭再與面商取道甯國行走藉壯聲威奏入

上命軍機大臣傳諭胡興仁曰鄧紹良所部一軍其勢已成渙散必須由浙趕緊籌撥兵餉庶可固結軍心著胡興仁卽遵前旨設法籌措毋得藉詞耽延至胡興仁奏稱甯防喫緊將由福建折回之兵勇二千五百名飭赴甯國聽候鄧紹良調遣此項兵勇著卽催令馮日坤等統帶迅速前進其總兵周天培現已行抵衢州俟到杭後仍著馳赴江南大營聽候和春調

道

上諭內閣曰甯國官軍攻勦南陵等處各匪賊中傷亡極多著鄧紹良等卽飭各軍迅速進勦已革浙江提標前營遊擊田應科已革平陽右營都司蕭傳科調防半載身先士卒尙知愧奮均著准其開復原官

同日署浙江提督鄧紹良奏言查甯郡設防在宣城南陵涇縣太平蕪湖五縣之地要隘三百

餘里兵勇僅萬七千有奇兵力本不爲厚春間
賊犯灣黃添募新勇二千餘名事平之後隨卽
裁撤其援浙之師六千雖經先後撥回又經臣
張芾截留三千現在賊以數萬之衆分撲黃池
鴉山孤山壩各防甯防要隘皆與賊巢爲鄰近
則蕪青繁銅可以呼吸而至遠則無爲和滁亦
可渡江而來兼以祿口秣陵溧水敗匪勾合金

柱關東西梁山逆黨而潛太舒桐相繼克捷縱
陽逆壘土橋賊營又爲上游官兵踏平竄身無
所直以甯郡爲下流之壑故抵死衝突而所派
防勇鴉山僅二千二百人孤山壩僅楚兵五百
其就近可以策應者石碓僅一千五百方村僅
一千一百卽臣駐防灣沚重地亦僅五七起楚
兵千名抽撥赴援究屬無幾至留徽之師疊經

咨調尙未趕至所請金陵大營及高瀉之兵亦未見到僅水師總兵吳全美派兵策應賊則日夜環攻未肯回巢仍散處於湖坪山頂乘隙來撲者五六晝夜孤山壩營盤於十月二十三日失守鴉山各營猶復力禦因無大隊爲援亦於二十五日潰敗現在鴉山突圍兵勇及方村石碓撤退之師經臣派赴紅楊樹方山西河一帶

據河築壘希冀暫救目前黃池大股賊匪業將
黃防牽掣更於烏溪搭造浮橋圖犯宣城建平
所派遊擊劉仁福帶勇五百會合民團數千力
扼要衝旣未可以輕動而南陵統領副將米興
朝又在告急各路援兵如能速至猶可固結軍
心顧全大局否則決裂卽在目前矣奏入

上命軍機大臣傳諭和春張國棟許乃釗鄧紹良曰黃

池灣汴爲皖南屏蔽江浙門戶必須厚集兵力堵其
紛竄昨據和春奏抽撥各營勁旅五千派戴文英前
往應援著卽飛飭該總兵迅速起程此外有無可撥
之兵該大臣等務當不分畛域移緩就急妥籌布置
鄧紹良務當拊循士卒毋令軍心渙散至閩省折回
之兵勇二千五百名因張騰蛟患病派遊擊馮日坤
等管帶胡興仁因甯防兵單飭令先赴甯國聽候鄧

紹良調遣計已兼程趕至鄧紹良得此一軍相助亦足稍振軍聲其周天培帶兵已抵衢州該撫擬令改由甯國行走惟江南現亦需兵已諭胡興仁令周天培仍赴和春軍營到時或留江南或撥往揚州均著該大臣等酌量辦理